



# Radunonza generala 2022

Sonda, ils 19 da mars 2022

Hotel Cruna, Sedrun

## **Tractanda 1: Beinvegni**

La presidenta Nicole Solèr fa a tuttas presentas in cordial beinvegni.

Schau perstgisar han Doris Friberg, Jolanda Duff, Ruth Giossi, Nina Levy, Kayleigh Brugger, Jovita Loretz, Chantal Widmer, Daniela Cavegn, Cornelia Berther, Rita Schmid, Sabrina Suppiger-Hendry, Barla Monego, Maria Cavegn, Rita Berther e Renata Monn.

L'invitaziun alla radunonza generala e la gliesta da tractandas ha la suprastanza farmess tier per posta.

La presidenta lai circular la gliesta da presenza e la gliesta da gidontras.

## **Tractanda 2: Elecziun da duas dumbravuschs**

La presidenta Nicole propona Gelgia Deplaz e Barla Cavegn sco dumbravuschs. Ellas vegnan elegidas cun in applaus.

## **Tractanda 3: Approbaziun dil protocol**

Il protocol dalla davosa radunonza generala era publicaus sin la pagina d'internet. Persunas che han buca access agl internet, han giu la pusseivladad da prender investa en quel sin banca tier la cassiera Jeannette.

La presidenta damonda, sche enzatgi hagi damondas ni giavischs per midadas, quei ch'ei buca il cass. La presidenta supplichescha d'approbar il protocol cun tener si il maun. Il potocol vegn approbaus unanimamein.

## **Tractanda 4: Rapport annual dalla presidenta**

La presidenta Nicole prelegia siu rapport annunal. Ins sa prender investa en quel silla pagina d'internet dall'uniun. Ultra da quei eis el allegaus a quei protocol.

## **Tractanda 5:**

Rendaquen dalla cassiera e rapport dallas revisuras

Il quen vegn presentaus dalla cassiera Jeannette. Cunquei che negin ha damondas tier quel, surdat la cassiera il plaid allas revisuras Irena Monn e Nicole Degonda che han controllau il quen. Tut ils mussaments ein avon maun ed il quen ei vegnius menaus fetg bein. Ellas supplicheschan la radunonza generala d' approbar il quen.

Il quen vegn approbaus unanimamein.

## **Tractanda 6: Fixar la contribuziun annuala**

La suprastonza fa la proposta da schar la contribuziun annuala sin 25 francs ad onn. La radunonza generala ei d'accord cun quella proposta unanimamein.

## **Tractanda 7: Elecziuns e reelecziuns**

La Katrin Mirocha ha deplorablamein demissiunau sco assessura. La presidenta engrazia ad ella per siu engaschi durant ils davos tschun onns.

Sco successura ha la suprastonza anflau Maria Santos. Naturalmein han las presentas era la pusseivladad da far autras propostas, quei ei denton buca il cass. Aschia recamonda la presidenta d'eleger Maria Santos sco nova assessura. La radunonza generala elegia unanimamein la Maria.

Vinavon sto la radunzoa reeleger l'actuara Lea Berther. La presidenta recamonda da reeleger ella. Era la Lea vegn reelegida unanimamein.

E sco finiziun ha la radunonza da reeleger Nicole Degonda sco revisura. Era cheu propona la presidenta da reeleger ella. Era la Nicole vegn reelegida unanimamein.

## **Tractanda 8: Program da lavur**

Ils suentermiezdis da dar troccas e las seras da giugs vegnan menadas atras vinavon meinsilmein, las datas san ins anflar sin la pagina d'internet.

Entochen la stad organisescha l'unien in'occurenza da far lieurs da Pastgas per affons da scola, in cuors da crear cartas da Pastgas, in cuors da zambergiar in canaster da fluras, la vendita da candeilas da Pastgas, duas sentupadas per mummas cun affons pigns ed ina fiera da plugls.

Suenter las vacanzas da stad vegn ei organisau in cuors da sedefender sco era il viadi per seniors/as. Ultra da quei organisescha l'unien era in viadi per lur commemoras sco era in suentermiezdi per affons da scola per zambergiar regals da Nadal.

Pertuccont il viadi da seniors/as vegn ei fatg la proposta d'organisar in viadi pli liung d'in entir di persunter mo mintga dus onns. Ultra da quei vegn ei proponiu da schar curdar il viadi igl onn 2022.

La suprastonza survegn l'incara d'organisar in viadi per las commemoras igl onn 2022 e d'organisar in viadi per seniors/as igl onn 2023.



## Tractanda 9: Varia

La presidenta preinformescha che la Jeannette vegni a cuntinuar siu uffeci sco cassiera. Tenor statutas ei il temps d'uffeci limitaus sin otg onns. La radunonza generala sa denton approbar ina prolungaziun dil temps d'uffeci. Alla proxima radunonza generala vegn la suprastanza a far la damonda da prolunghir igl uffeci per la Jeannette.

Sco engraziament per lur agid survegnan differentas gidontras in matg flurs.

La presidenta informescha davart il «conto social» che munta actualmein a circa 7'300 francs. La radunonza generala dat la cumpetenzza alla suprastanza da sliigar si quei conto e da disponer libramein da quels daners. L'idea dalla suprastanza eis ei da far ina pli gronda donaziun a favur dils fugitivs dall'Ucraina e da metter dalla vart ina certa summa per organisar pli tard in'occurenza speciala per las commemoras e da metter il rest dalla summa sil conto current.

La suprastanza luvrass el futur bugen cun differentas sutgruppas per saver reparter las vastas incumbensas dall'uniun sin differentas schuialas. Pli biaras che gidan da purtar ils pensums dall'uniun e pli bia che sa vegnir realisau. Igl ei gia reussiu da scaffir las empremas sutgruppas e d'anflar persunas che sorprendan la coordinaziun da talas. Aschia ha la Sonja Decurtins la responsablada per ils suentermiezdis da troccas, l'Ursula Deplazes surpren l'organisaziun dil di d'oraziun mundiala, la Kayleigh Brugger stat a disposiziun sco persuna da contact dalla gruppa da mummas cun affons pigns e l'Annina Caduff stat a disposiziun sco menadra dalla gruppa da gimnastica «Pinocchio».

Bugen havess la suprastanza era ina persuna che coordinass la Via d'Advent. Deplorablamein eisi aunc buca reussiu d'anflar ina tala persuna. Enstagl d'organisar ina Via d'Advent vegn ei proponiu dad ornar quater baselgias ni capluttas ed arver mintgamai «ina finiastra» mintga dumengia d'Advent.

La radunonza generala sustegn la proposta da luvrar cun sutgruppas ed ei era dil meini che las menadras dallas sutgruppas astgan prender part alla tscheina dalla suprastanza.

Nicole Giossi engrazia el num dalla suprastanza communal a la suprastanza dall'uniun da dunnas Tujetsch.

La presidenta engrazia per la participaziun e l'attenziun e siara la radunonza.

Surrein, ils 23 da mars 2022

Lea Berther, actura



Nicole Solèr, presidenta

